

項城縣志卷二十六

列女志一

賢母

國朝

王氏吳廷銘母明大義廷銘生匝月父故氏有孟母風幼即教以仁讓及長族人與之爭產氏令廷銘讓之母子手闢己地數十畝鄰人豔而爭亦讓之族人宏訓少孤苦無依育於家嘗曰以孤撫孤當加之意比授室猶同居焉廷銘率母教遂為善士

高氏生員宓女馬嘉蘭母孝事舅姑色養備至夫歿撫子寬嚴並濟子英年即有聲黌序氏之力也享年九十二雍正乾隆間兩受皇恩粟帛知縣吳公旌曰孝壽賢母

高氏庠生宸女生員馬金鏞母孝慈兼備乾隆元年氏年七十七

歲 恩賜粟帛知縣吳溶扁其廬曰齒德兼全

張氏生員馬紹載妻幼嫻姆訓于歸後事翁姑相夫子以賢孝聞  
紹載故母老子稚氏以婦代子定省無倦訓子有方長子瑞圖  
有聲黌序遵母訓設立家塾教兩弟瑞錫瑞麟均入庠人以為  
孝慈所感署陳州分府韓儀以孝慈裕後旌之

李氏高師龍母孝慈兼盡勤儉素持年七十 恩賜粟帛知縣

趙德宏以壺範堪式旌之

以上舊志

郭氏淮甯郭如珽女庠生袁耀東妻也以子貴 誥封一品太夫

人耀東家貧氏親操井臼得堂上歡生四子一女耀東遊泮後  
未幾卒氏竭力撫孤艱苦備嘗嘗訓諸子曰爾父讀書未竟齋  
志以歿爾等不能承先志是爾父無子也典釵珥延名師晚自  
塾歸燈火課讀恆夜分不輟如是者十餘年長樹三篋於庠旋

貢成均仲甲三道光乙未聯捷進士宦擢運總督諡端敏鳳三  
貢生禹州學正重三廩生樹三早逝夫其撫其遺孤保忠保慶  
恩勤周至保慶後以咸豐戊午舉人官江南鹽巡道端敏官侍  
御時就養都中嘗訓之曰此官代天子立言慎勿避權貴勿事  
空談勿毛舉細故為天下興利除害方為不負己職每散直歸  
必誦日所奏行有不當意輒援古名臣相敦勵故端敏在樞廷  
以蹇諤著不敢依阿長官蓋得力於母教者深也道光庚戌三  
孫保恆英年成進士授編修一門清貴日以持盈戒滿為孫曾  
勸家居皆布衣童子不得衣裘帛惟救災恤貧不火吝惜道光  
甲辰河決中牟波及項邑民田有被淹沒者命家人散粟煮粥  
以濟丙午豫境大旱命男甲三倡捐二千金又勸同鄉官京師  
者共釀萬金助賑咸豐丙辰丁巳項大饑貧族待舉火者五十

餘家曰此一本之親可膜外視耶又於所居村南北設厰數未  
麪人給一孟日給可千餘人平生於侍婢笄年必為擇壻遣之  
曰若無依事我如父母忍使失所耶年踰八旬 御書懿栞

頤齡匾額及福壽字並文繡如意以 賜因遙諭端敏曰三

世蒙 聖恩體念如家人父子義當致身勿以我老為念同

治二年端敏以軍事積勞成疾卒於郡諭孫保恆保齡曰爾父  
忠孝全歸我復何憾但逆亂未平有志未竟爾等當承先志以  
報 國恩年九旬 御書瑞昭彤管以賜年九十七 御

書百齡衍慶以賜復加 賞銀緞 勅建百歲坊光緒二

年卒

高氏字梅閣晚年自號荆布老人貢生玉麟女太學生張東林妻  
也高為邑中詩禮世族諸兄弟以同肄業舉講求文章科第氏



獨謹言慎行存心日用倫常之道諸弟皆敬憚之惟剛正沈憇  
言論訥訥好讀小學論語詩仿杜工部字學顏魯公篆隸繪畫  
罔弗精工年二十二歸張張世業武乃藏其書籍翰墨操井臼  
典釵鉏以供舅姑旨甘舅姑怒委曲承順姑有故或不食亦不  
食必俯伏引責數請色喜而後已初生一女二子皆幼殤已自  
分無子為夫買妾王氏生二女一子氏年四十子安雅生未幾  
王卒子女俱幼撫育若己出王氏子博雅稍長與安雅同學而  
博雅卒不能讀安雅聰穎異常學問淹博早年有聲費序下筆  
數千言立就老人教以小學論語事親敬長應對進退之節不  
汲汲於帖括應試之學或問之曰吾不望其為官但願其為人  
耳晚年好讀先儒語錄教子隨時隨處體貼事物當然之理又  
曰學問實際全在飲食言語應事接物上從此用功乃為知行

並進箴子詩有云工夫不向身邊做學問難從天上來希天事  
業匪高遠下學功夫要始終其平生得力於學問者深矣至目  
眊不能觀書喜作顏體大楷臨摹不倦成豐庾申秋感微疾索  
愿書問冬至家人不解其故曰剝盡陰極吾必不起矣已而果  
然其子臨終請遺訓曰矜字是汝一生病根又云凶悔吝皆生  
於動靜而能守鮮有羞辱胞姪高太史釗中往問疾猶令人力  
扶起坐論學良久病三月衣冠坐卧必正盥漱必灑生平力闢  
佛老不信風水病革囑葬村西北首以遵古制旌銘不許用待  
贈應贈字樣云在加者為誣在受者為僭著有形短集子安雅  
復錄老人訓誡語附諸集後卒年七十七

李氏沈邱候選布政司理問衡竇女麗水知縣高峽雲妻性慈惠  
與人無疾言遽色善持家置會計簿日閒柴米鹽蔬布帛酬應

等需出諸囊夜分招諸子一一登記積數十年無差己無私積人無偏與教子欽中劄中嚴而有法夜伴讀雖曉烏啼子未眠不先寢也一女適趙氏早孀每歸省必諭之曰事若姑當婉愉小意思以婦兼子也撫若叔當曉大義思以嫂代兄也歲豐閒鄉里盜起二子皆以京官歸養於家未嘗一語促入仕人詢之曰貧固吾分吾居浙五年見仕途澆薄浮華非吾兒所習吾願若輩作好人不願若輩作美官若澹於心吾亦澹矣年老失明常兀坐一榻無躁容卧病百餘日呻吟中無亂言卒年八十四歲 誥封恭人

許氏淮甯許大敬女楊華修繼配性敦厚閒靜寡言事翁姑孝謹以旨甘奉親而自奉甚約撫前室二子一女如己出績紡恆至夜分生五女皆長晚生二子長明德次殤雖鍾愛不事姑息諄

諄教以讀書作人為事教諸女悉賢淑婦胡氏亦淮籍父永安  
早歿母劉氏有風疾數年不痊日夜呻吟奉事無違母卒依凡  
嫂勤女紅理中饋不憚勞及于歸舅姑已老妯氏有痰疾喜怒  
無常氏事之均能得其歡心夫性嚴承以和柔有姪婦與氏同  
庚善遇之任勞讓美終身無間諸姑至家思誼拳拳或有貧者  
夫命賙之必踰其量而後安伴子讀書子未眠不先寢也或倦  
於學必責讓之薄於自奉有美味必推以與人笥無餘衣有輒  
濟貧二子幼時皆令衣破食麤恐貪口好奢損其志也及各娶  
妻仍以勤儉為諸婦先紡織鍼黹夜分不倦每早入廚下子婦  
勸其稍息不許二子既長多從賢師友遊每佳客至喜形於色  
命諸婦趨具饌必豐必潔晚年值生長必命二子備物親往祭  
父母長子凌霄庠生次凌閣己丑 恩科舉人三上春官不第

氏毫不介意且慰二子曰母子兄弟一家和樂勝似做官多矣  
二子體母教絕意進取專志正學尊師取友以成其德周旋膝  
下怡怡承歡年屆七旬諸相知致詞以祝卒年七十三歲以子  
貴 誥贈宜人

鄧氏陝州學正玉皜女歐陽淑楹妻性仁孝恭儉讀書嫻女儀于  
歸後孀姑年老善病侍奉湯藥不假手臧獲及沒喪葬營辦氏  
內助之力尤多親族中有不給者量力周濟生六男二女均教  
之讀長男肇之歲貢次浚之太學生績學早世四炳之增生五  
繡之進士刑部主事直隸井陘縣知縣六省之廩貢孫曾食餼  
遊泮者四五人謂非栽培者厚而發祥者遠歟以子貴 誥封  
恭人卒年九十餘

高氏廩生余朝昇妻幼嫻母訓及歸事翁姑承顏順志逢怒長跪

請責怒息乃起每歲時及先祖生忌辰致祭果饌必躬親朝昇  
治家嚴氏以柔順佐之終身無違言非弔問不輕出門戶夫姊  
歿遺女尚幼氏承姑命撫之及嫁治妝如所生教子連萼嚴而  
有法私食華服一切禁之有過責不貸賞言養小兒如養處女  
動靜必須關防自奉儉子婦奉雞豚輒以折福逾分戒勿再進  
及為子姪待良師益友必豐必潔連萼嘗受業楊子岡先生會  
盛暑先生病歿於陳郡學署聞訃促連萼往弔曰楊公恩師也  
死生不可負尤好善樂施遇乞丐及孤孀無依者雖無餘必給  
之遇僕役皆有恩光緒丙子連萼舉於鄉氏謂男兒雖志在顯  
揚尤宜以盈滿為戒其平生敏抑類如此享年七十餘連萼癸  
未進士刑部主事氏 誥贈恭人

馬氏太學生楊茂如妻夫中年物故遺子二長鎮莖次莫莖皆幼

氏教之嚴雖遭兵燹未嘗廢讀後鎮堃中光緒己卯科副榜官汝陽教諭莫堃入邑庠氏生平勤儉持家輕財重義親鄰乞糧者每斗外另添半升許借貸無弗與者鎮堃出繼長門所遺產業財物被族人瓜分不與校且謂其子曰汝父所遺田產儘可過活何必爭取他人業乎其寬惠退讓類如此

趙氏張應乾妻性端嚴讀書通大義生四子夫故家素封經紀內外秩然有序不惜百金延聘名師課諸子讀長宗永附生次宗說廩生三宗軒歲貢四宗翰童武屢前列氏卒年八十八

劉氏庠生袁保中繼室性賢淑事祖姑郭姑王皆得其歡心遭捻匪亂保中在外治團練謀守禦家事多賴氏身任其難處妯娌能讓以和待諸卑幼有恩夫卒祖姑年屆百齡姑亦八旬老且病氏含悲茹苦強顏愉親晝供酒漿夜勤縫紉盡慎盡禮以終

兩姑之世賢孝 聲溢於閭里御下以寬惟督責諸子不火貸  
每述先訓稱忠孝以相警勉至於顯貴無時不然性好施濟光  
緒三年大旱十三年大水皆出巨貲以賑平日雖席豐履厚而  
儉約自處每當諸子晉階受賞輒屏賀客以滿盈為戒四子世  
凱巡撫山東迎養任所年屆七旬有請稱觴上壽者峻拒之以  
和議未成 乘輿未返西望咨嗟寢食俱廢觸發舊疾遂致  
不起 欽賞正一品封典有教有義方之褒 賜祭一壇

韓氏沈邱宿儒應泰女庠生于金波妻幼嫻姆教于歸後能得堂  
上歡姑歿持家有法門以內無間言夫入庠後閱三月病故子  
建章十一歲夫弟金露金鼎皆中年喪耦金露有子女各一金  
鼎女四堂弟金相兩次喪耦有子女各一氏前後撫養無娘兒  
十人愛如己出痘疹疾病晝夜操勞諸弟德之析居時讓住老



宅皆曰不忍使嫂再勞心造作且悞建章讀書也後以積勞成疾卒年五十六建章弱冠入庠旋食餼光緒戊申歲貢生

程氏沈邱庠生繼洛胞姊馬青雲妻性賢淑讀書通大義年十九于歸翁姑先沒與夫兄嫂同居本業三頃餘兄出繼得田四十畝氏勸夫與兄復合爨後析居兄弟均分夫故子書謙幼內外摒擋賴氏一身族人好文貧死無以葬氏助之棺買夫堂兄青峯地二畝餘青峯歿時子已逝氏憐其媳貧苦孀居地令再賣將已約火之有借貸者悉焚其券卒年八十二歲子書謙太學生

王氏廩生田藍田妻年十九于歸翁姑治家嚴氏委曲承順均能得其歡心年未三十因學生未育窺翁姑抱孫念切勸夫置側室以廣似續妾徐氏生男又未育姑歿勸翁再娶申氏無所出

而氏生子鴻飛甫五月夫故逾年翁亦故氏念外事需人經理  
乃集族共議延夫之嫡堂兄庠生箴主之箴忠厚長者恆教讀  
夫素愛其姪執璋氏亦待之如子令居己家從伯父讀族中有  
貧乏者周濟無少吝鴻飛四五歲即令就學督責不貸後入邑  
庠有聲藝苑方翁歿時繼姑申氏妾徐氏均年二十餘歲氏攝  
擋家務各授一職二十年閨門整肅內外秩然卒年五十六

韓氏張景文妻年三十餘寡一子積賢數歲貧如洗氏傭於世家  
工鍼黹勤澣濯不憚勞瘁積賢稍長命從軍智勇兼備疊著戰  
功歷保都司儘先補用並加游擊銜氏享年六十一 贈恭人  
韓氏田炳勳繼配性慈良敬戚姑和諸妯撫前子如己出生子作  
霖教之維嚴及夫歿尤督責不事姑息作霖亦奮勉勵志有為

以武功顯氏

贈一品夫人

賢婦

國朝

李氏馬相如妻克盡婦道夫早世治家勤儉教子成立享年百有三歲奉 旨建坊旌表

李氏師永年妻幼嫻姆教習內則年十九于歸克盡婦道夫歿撫孤承宗教養成名四世同堂雍睦之風鄉里化之

馬氏庠生體元女州同高應簡妻佐夫教子孝慈克盡年八十恩賜粟帛知縣張為旦吳溶以懿德流芳瑞叶瑤草旌之

朱氏鄧金聲妻明禮義相夫子事翁姑以賢孝聞子孫成名賴氏教之年九十 恩賜粟帛

師氏生員高應旂妻幼嫻內則不輕嬉笑事父母以孝聞于歸後相夫成名教子有法處妯娌和平樂易歷三十餘年無閒言至

扶危濟困尤巾幗中不多見者知縣趙德宏旌曰閩閩遺範  
劉氏張世雲妻張原籍祥符以避亂隸項姑王氏沈疴歷十餘載  
不能起氏奉湯藥惟謹病益劇旬日不食割股奉之立能起食  
數日而愈子悌順治辛卯科解元墊江縣知縣

師氏生員王輝祖母孝順性成事翁姑克盡婦道姑年老臥牀不  
起氏色養備至人咸以孝稱之署篆吳淞區曰女宗仁壽知縣

張為旦區曰德壽兼隆

以上舊志

張氏克謙女閭燭妻淑慎柔嘉甚得堂上歡翁染時疫醫藥罔效  
氏焚香默禱祈以身代仍不愈潛入廚下剖己肉為湯以進翁  
飲之遂瘳

竇氏舉人豹變女庠生楊效孔妻子林桂殤勸夫置妾生子仙桂  
愛如己出壽踰九旬鄰族贈匾曰天錫純嘏

呂氏田春敬妻性淑靜克執婦道翁素濫博嗜飲氏事之不懈翁感悟終身不入賭場氏與夫皆臻上壽

戴氏文奇長女庠生張彬妻彬貧而嗜學赴上蔡書院讀書苦無資氏以紡績所積布數足以助之內而事翁姑操家政皆氏任之恐分彬讀書心也晚年家少裕遇貧苦必周濟之嘗告諸子曰吾初于歸時家徒四壁吾勤女紅數年後一家始有全衣彬好客每知交來氏必竭力供飲饌而自奉則必約焉壽八十餘夫婦齊眉孫曾玉立非厚德之報歟

王氏陳玉珍妻性孝事親惟謹翁病狂疾發輒令人叩頭家人皆難之氏獨不違人曰亂命何必從氏曰不如此則翁必怒吾惟使翁喜耳氏壽九十一五世同堂

馬氏適庠生王君字閣修遺其事孀姑以孝處妯娌以和姑常病

思異味氏慨然引刀欲自割姒氏急救之姑病亦旋瘳生三女無子勸夫納妾甫舉子而妾歿氏愛如己出以養以教俾臻成立納資入太學壽八十餘龍怡如先生為作序美之

高氏李萬如妻性孝姑久病不愈禱於神願持齋三年一日夢神人謂曰汝能割股療親病即愈氏頓醒起以齒嚙左腕右手持刀割肉一臛作湯以進姑飲之果愈

馬氏王秀嶺妻于歸未幾姑病垂危氏暗室泣禱截指祈療夫聞刀聲趨視之指已斷落煎湯進果愈

楊氏卜麟女李青峯妻性溫淑姑早世翁與繼姑俱病癱瘓氏奉事弗懈洗滌穢污畧無煩怨如是十有餘年待卑幼有恩里黨交稱

金氏大鴻女張京周妻年十九于歸翁已棄養事姑極孝夫兄弟

析居後氏獨與姑居奉養皆出於己終無懈志夫故姑恆卧病氏衣不解帶湯藥親嘗姑歿哀毀骨立既葬負土築墳孝行之篤如此

樊氏增生春元女監生夏凌雲妻早歲失怙事母以孝聞于歸後母得暴症卒聞訃痛幾絕以未得面訣為終身憾每談及輒泣下事重闈舅姑得其歡心處妯娌無間言避亂居城費用浩繁負債累累翁憂甚氏商諸夫柳補以母家貲處事有條理舅姑喜委家政焉旁親歸依分宅以處之有近族名同雲者母子艱苦給廩米供養不絕親屬中間疾助喪分多潤寡體恤周至子四耀榮舉人大挑知縣自有傳其榮早世光榮太學生慶榮候選縣丞孫八人毓璜增生毓琦附生毓珮從九品餘俱耕讀曾孫十餘人知縣王公贈以親見七代匾額五世同堂先代已兩

見之壽七十一以子貴 封孺人

龔氏張子渠妻性寬厚持家勤儉事翁姑相夫子有賢聲處衆忍讓事有拂意未嘗輕見辭色戚鄰求無不應於恤老憐貧尤加之意同治間西北數縣人被虜逃歸者絡繹於道子渠施錢米皆氏贊成之生一女無子撫夫弟子維屏為嗣壽九十四孫三寶弱冠饒於庠宣統元年 恩貢

閻氏武庠生中銓女高執中妻性慈祥事翁姑能得其歡心娣姒閒無怨言鄰里借貸無弗與家嘗獲一盜時當暑繫烈日中盜渴思水氏烹茶飲之其愷惻多類此子寶賢性行肫摯如其母媳張氏亦賢淑

劉氏父錫乾字健菴太學生 贈榮祿大夫教家有法氏幼嫻姆訓女史閨範等書皆曉大義及笄歸 贈光祿大夫張瑞楨孝



事翁姑敬相夫子又勤儉持家縫紉紡績皆身先僕婦姑顧而喜曰有婦若此吾家之興可計日而待也妣氏王冢婦也長於氏十數歲凡事必稟命而後行夫兄中年早歿妣氏悲傷常廢寢食氏多方勸慰撫諸姪女輩如所生成咸豐閒遭匪亂遵翁姑命中分其產夫念嫂氏早孀且食指繁推財讓產氏體夫意並無閒言及子鎮芳就傅夫兄幼子存智與鎮芳年相若飲食教誨未嘗歧視夫遭族人構訟乃攜其子遊學梁垣家事皆氏任承而條理井井鎮芳甫弱冠即遊庠食餼列拔萃登鄉薦捷南宮幼子錦芳亦早年毓於庠夫晚年亦登甲午賢書氏處之如平時無稍驕矜值麥秋必于田歲晚必手治綿花以禦冬終身衣粗食淡綺羅珍醢弗尚也所謂已富而能勤已貴而能儉者歟女三長適汝陽廩生楊亭雲家貧氏多方調濟次適太學生

夏奇勳次幼殤夫性嚴教二子責撻呵斥不稍寬假氏以寬濟之使優游有餘地夫好推解氏遇族鄰貧者或假以錢財或資以衣食亦有助夫德焉宜其子之昌熾顯大為不可量也

鄺氏鄧錫潤妻素有賢名姑嘗患癱症氏左右侍養十餘年不稍懈平生無疾言遽色娣姒雍睦無間待子姪輩有恩壽七十餘高氏劉銘新妻事翁姑孝姑有疾目不交睫者浹旬垂危詣神前願茹素三載祈姑病瘥

張氏田霖雨妻家貧翁瞽氏竭力奉養飲食親進數十年如一日翁賴以終天年鄉里稱孝

路氏閻淑慎妻性恭順事翁姑得其歡心夫有兩兄夫婦皆相繼棄世氏撫其遺孤如子教以耕讀家道雍睦二十餘口無閒言咸同閒夫姪松棟罵賊死松聲染病亡棟妻張氏聲妻劉氏欲

死殉氏泣勸曰汝等殉夫於義得矣如孤息何遂皆感悟撫孤成立以節著稱氏壽八十二

閻氏夏書堂妻家貧夫不事生業氏屢勸不悛姑患癰氏行乞奉養鄉鄰知其孝遺以菜肉氏悉持歸奉姑如是二十餘年

趙氏發祥女王懷德妻翁嵩峯庠生家法嚴峻皆憚之氏獨曲意承順得其歡心姑于氏善女紅嘗云余命多蹇得此媳可謂天幸翁姑歿葬祭盡禮忌日必設祭夫兄弟四人早異居次兄懷秀夫婦早世遺子女各一貧無依氏撫如己出子為置產授室女厚嫁之夫弟懷漢女遭繼母虐氏字之不避嫌怨先是小姑適郭期促家貧無以備奩妝翁姑有難色時氏于歸甫五月慨以己嫁時所有盡與之娣姒笑其愚曰吾願也終無悔又夫兄弟有產業蕩盡憂東餒者勸夫典地贍之年八十八卒子庭靄

克家

李氏泰峯女張勤修妻母病侍湯藥朝夕不離側嘗糞以知瘥否  
嫂病服事如母子歸後事翁姑以孝聞姑歿遺幼子六人皆氏  
撫養成立

王氏歲貢尹東耀妻性賢孝姑病癱卧牀近十年氏晝夜侍奉無  
倦色姑甚宜之每稱其賢處妯娌和而忍同居四十年無詬誶  
聲臨終囑諸子曰吾一生好喫虧不愛佔便宜汝輩勉之年六  
十八卒

余氏應詔女馬淑臣妻母歿寄外祖家十餘載繼母又歿異母弟  
三人衣服飲食皆體父心推恩有加于歸後執婦道維謹門內  
無詬誶聲翁病典簪珥供湯藥費夫弟家計益艱勸夫量力周

恤

王氏國法女顧同升妻性溫淑事翁姑維謹妯氏性嚴急動加呵責氏恆以笑語應之後妯氏夫婦相繼歿遺子女三長十餘歲幼甫週氏撫愛如己出及長為營婚嫁心力交瘁親族稱之姜氏丕興女王德成妻性淑惠事舅姑維謹妯夏氏先亡遺子女三長四歲幼僅數月飲食教誨愛如所生人以為賢傅氏張心泰妻子歸時舅姑已歿夫有一弟兩妹俱幼依氏如母長為營婚嫁嗣夫弟以他故求異居凡田宅器具氏勸夫以美者讓之人以為賢子體修亦孝

祁氏閻淑身繼配前室陳氏遺一女甫二歲氏撫之極有恩後氏生五子凡衣服飲食美者皆給於前女人稱其慈年八十七卒樊氏進士執中元孫女閻淑文妻孝事翁姑淑文懦不理事家中落氏日夜紡績供養遭咸同之亂家計愈窘二老相繼去世殯

葬皆氏之力有奸人唆其夫離散家室者氏知之潛逃母家夫歿歸而營葬

董氏徐仲南妻年十一母卒弟福泰九歲福興甫晬衣服飲食皆氏為經理及適仲南夫醜且貧氏無違德夫病祈以身代父嘗貿易於外氏商諸夫同移母家居以便事親撫弟父因無內顧憂二弟授室始歸

曹氏臨珠女楊漢水妻夫故氏年三十餘僅一女欲身殉人勸以翁姑年老孝養為重乃忍死經營葬事事奉翁姑均能得其歡心鄉里交稱歿後為立碑以旌之

劉氏趙廷珍妻性貞靜事翁姑能得其歡妯娌間無怨言相夫教子均有賢聲姑久病嘗焚香願以身代侍湯藥奉飲食數年不倦子文軒庠生

蘇氏庠生李憲孔妻侍翁姑疾晝夜不懈湯藥親嘗生數子俱夭  
勸夫置妾生子澄川愛如己出澄川亦孝

趙氏書正女麻春元繼配事翁姑以孝聞佐夫持家井井有條撫  
前室子國勳如己出後生子世勳銘勳待之未嘗有私三子亦  
相與友恭見者不知其為異母兄弟

孟氏三祿女吳方舟繼配幼有賢名于歸後生二女撫前室子如  
己出夫或怒笞前子氏輒抱之勸夫不從至為涕泣子生孫獻  
既婚早世遺孤賴氏撫養成立

丁氏增生懋堂胞姊劉全義妻克執婦道翁姑年老每進棗栗以  
健脾胃姑病祈以身代藥必親嘗家用不給盡典嫁時衣服以  
佐之夫姪四人早失恃氏撫養如己子同居四十餘口雍睦無  
間年八十二卒子蔭棠增生毓棠附貢皆好善

李氏紹孟女張心順妻性慈淑幼從父讀于歸後事翁姑處妯娌有賢孝聲年三十三夫故遺三子撫養成立次婦歿遺子女俱幼季子夫婦俱逝遺孤甫三月氏躬親撫養備極辛苦年七十卒

葉氏字靜可正陽人河南府教授士林第五女舉人王茂松第三子庠生鎬妻也幼讀書淹貫經史年十二即能詩于歸後恪遵婦道不自矜炫人無有知其為女學士者年三十無出為夫納妾生子愛如己出因母家道遠歸甯弗便往往形諸詠歌咸同間迭遭兵燹家窘甚商水趙姓延為女師嗣是人皆知其才學世族大家爭延聘之氏亦賴以自給嘗館某家歲暮未歸讀采薇詩有感云豈是昔人征戍苦半緣養靜半緣饑可以想見其人矣以母家富屢往似有乞憐之意遂不常往胞弟蔭昉為湖



北兵備道時屢招之始一至不招不至也生平吟詠題曰隨意錄藏於家

崔氏三問女王體善妻事翁與繼姑克執婦道翁嗜博蕩產僅餘田三畝氏竭力奉養無怨後翁以盛夏患臌症卧具溼輒易去青蠅如織左右揮拂數月不倦翁欲于田氏命二子昇之提茶以從持家勤儉置田百畝子孫化之皆賢孝

張氏長安女高錦堂妻錦堂病危醫藥罔效氏斷指療之夫病遂瘳

田氏李保情妻有至性保情病晝夜侍湯藥病危氏剜臂肉療之遂愈

張氏侯窩妻窩性至孝氏尤過之家貧無立錫奉姑勤慎遇凶荒夫婦乞食以甘軟奉親自咽粗糲有子甫數歲恆啼飢每食時

先叱出之恐母知分食以食之也其純孝過人有如此者

張氏相如女章淑印妻事翁姑能得其歡有叔姑遺異疾垂危氏聞古人嘗糞知生死取嘗味苦延醫治之病果痊

王氏郭東寅妻奉姑至孝姑病垂危氏割己肉和藥以進姑飲之遂愈

李氏夏永思妻夫故遺一女甫數歲氏教養成人勤儉持家好施與知縣恆公捐廉建昭忠祠氏捐地五十畝以為歲時祭祀之需知府劉公為文紀其事

劉氏沈邱監生劉效乾女田連元妻有至性讀書通大義父年四十餘無嗣納妾生子肇元母王氏遇側室虐氏每勸止之于歸後姑歿翁繼娶兩姒均鄙之氏獨孝敬無違及析居翁惟依氏夫婦以居氏年九十二卒

薛氏趙東憲妻事翁姑相夫子以賢孝稱夫以佃田在外遺產十餘畝被悍族霸占數年不分籽粒欲鳴官氏勸止之族人亦感化後氏置田三百餘畝積金無算曾元繞膝五世一堂年九十卒

趙氏王毓秀妻初家貧後以居積致富夫與二子相繼歿孫九成甫數歲氏理家務為孫延師課讀備極勞瘁壽踰百齡曾孫濟濟四世一堂

王氏田錫友妻事翁姑孝持家勤儉置田三百畝敬老憐貧遇有骨肉嫌隙委曲勸諭多所感悟年八十四卒

張氏李元化妻孝事舅姑妯娌無閒言生女五已自分無子每炊另儲米麪若干留以濟貧數十年不懈年五十二生一子冠卿入武庠孫四人克世其家氏年八十七無疾而逝

金氏淮甯金明哲女六品銜竇榮封妻淑慎勤儉娣姒五人和睦無間未幾夫與次子相繼亡四弟婦早逝遺孤弱無依氏事翁姑撫諸姪男女衣食教誨皆一身任之年九十三卒

閻氏王雲錦妻性賢淑克執婦道姑趙性嚴氏委曲承順務博其歡趙年老有痼疾奉事更謹雲錦歿氏年三十二子九成方七歲有小失督責不恕好施與凡親戚借貸無弗與九成亦慷慨好義遵母教也壽八十餘孫曾蔚起

魏氏庠生于三樂子思聰妻孝事翁姑姑歿遺子方旬日取名小苦氏乳育之瘡疹疾病憂勞備至家貧紡績度日夫中年歿無子為夫弟娶某氏生子夫弟又歿娣氏矢志守節氏待之愈厚撫其子成立兼祧兩門氏年七十五卒

韓氏沈邱庠生韓敦龐女監生王祿增妻于歸時舅姑年踰七旬

飲食需人氏左右侍奉不少懈家貧歲歉生計益窘氏謂夫曰  
盍典吾嫁時衣為供養費餘作小生理尚可餬口夫從之貿易  
於外氏任家事井井有條姑歿叔及小姑俱幼氏撫養成立為  
營婚嫁好施與咸同閒避難居寨者多衣食不給氏奉翁命周  
濟之閭里貧者歲飲助以為常夫叔父早世乏嗣宜夫弟承繼  
時尚幼以氏次子治其喪夫弟既長戚族咸謂當分地百畝宅  
一處與氏次子氏聞之曰兒輩能自立即巨富可致否則己業  
且不能守何以多為固命其子勿受

王氏監生范丕顯妻性仁慈事翁姑極孝持家勤儉佐夫置產百  
餘畝夫族姪錦芳貧無歸氏商諸夫為賃房給資本貿易錦芳  
遂致富氏壻沈邱庠生耿光嗜學無資皆氏供給族多游手  
者氏命子錦袍錦舒以田分佃之年七十五卒

夏氏庠生獻三女監生衛其元妻性淑慎明大義助夫盡孝能得堂上歡無出勸夫納妾不從代置之逾年妾生子普泰氏愛如掌上珠教養備至夫兄嫂早世遺孤數歲撫之成立氏年六十卒


馬氏候選縣丞王遐齡妻翁歿事姑委曲承順姑病垂危截指入藥病立愈後數年姑又病氏祝天願減己壽一紀以益姑病又愈

霍氏先登女王良培妻夫病危氏割股肉和藥以進夫竟不起氏年三十三以憂卒

補遺

某氏樊梅妻進士執中母性溫和初于歸母家夫家俱貧氏井臼親操事翁姑維謹終身無違顏值歲歎自食粗糲其精者以為

堂上供翁病噎氏朝夕進酒和以甘旨俟進少許而後即安年  
餘不懈姑壽八十九晚衰卧牀褥者三年澣穢滌污不假他人  
姑嘗言吾家之興自長婦入門始處諸姑及妯娌始終無間言  
夫務農芻牧耕耘之事氏輒代之每雞鳴而起丙夜不息後拓  
田十倍於前皆氏內助之力也生子二長業耕次執中就讀自  
衣服飲食一頓一笑皆教之有法不以煦煦為慈其待諸婦無  
疾言厲色遇有失微示其端使知自悔處親鄰假貸無吝色御  
奴僕務存寬厚族黨內外無不稱其賢者及子執中成進士家  
業興隆氏無矜驕色仍以勤儉忍讓為子孫勛可謂婦德之全  
矣





項城縣志卷二十七

列女志二

節婦

明

王氏李唐興妻唐興病革語王曰勿以死忘吾夫婦義育我子俾承祀焉死無憾氏泣曰所不視弱子成人而蟻節者有如曩日興卒氏泣絕再甦量產營葬孀居四十餘年不易初志事聞旌表

李氏趙二妻夫故氏年二十五斷髮矢志遺腹生男氏歎曰妾不幸曠巾櫛於夜臺幸撫茲血孤承趙祀稍愉志矣躬機杼教子成立卒年九十四知縣吳時達表其居曰節婦之門雍正六年始入節孝祠

婁氏任守愚妻夫故氏年二十二無嗣立志守節素患羸疴不藥而愈歷四十餘年卒事聞旌表

沈氏司訥妻夫故氏封髮自誓時年二十訓子孫必以詩禮稱未亡人者六十餘年知縣陳萬言以貞節旌之

袁氏太僕寺少卿俊第九女性貞慧六七歲時知孝敬及長歸太學生張玄為繼配勤供婦職視前子如己出夫卒年二十八割鼻矢志斥去妝飾所生一子名應宿數齡即遣就學夜張燈績絮佐讀知縣高其節屢遺粟帛獎之子應宿歲貢生

陳氏師三戒妻孀居三十餘年無異志萬歷二十七年知縣給扁曰矢植勁節

李氏楊一元母堅苦守節一元孝養無違知縣以母節子孝旌之張氏生員黃正色妻夫卒撫孤成立守節不渝知縣以植節撫孤

旌之

靳氏生員士廉女年十八歸生員師三統五年夫故一子未週氏日夜號泣不茹葷者三年事翁姑三十餘年無缺禮撫子可尊成立家道不墜知縣給扁曰植節撫孤

賀氏馮時化母賀與子婦蕭氏守節無玷時化事母孝撫姪民悅民服婚娶成立萬厯二十有八年知縣王欽誥旌賀蕭扁曰一門雙節旌時化曰孝弟高誼

國朝

媯寡婦鄭郭集人姑老無齒不能食穀氏以乳養姑數年姑以壽終順治三年大風拔木走石聞空中人呼曰切莫驚動媯寡婦集中房舍千餘間無一存者惟媯寡婦草房四間無所損按此女傳中劉福祖事均係于君金露偶於塾中拾字紙者藍內檢出事詳雜誌異聞中二百年前事竟於廢帙中無心得之正值

續修邑乘可不謂神歟  
節烈之不可掩也如此

姚氏生員高三善妻孀居五十七年撫孤三世知縣郭給扁曰貞節可風知縣李扁曰冰霜雅操唯陳道扁曰植節代終年八十  
三卒

石氏生員閻燦妻燦卒氏年二十九冰蘖自持撫遺孤圭慈嚴並濟圭早年入庠娶馬氏生子麟甫三歲圭又亡氏年已六十餘矣馬氏悲悼嘔血誓身殉氏泣曰上有孀姑下有遺孤若不憐念乎馬氏遂決志苦守勤紡織寒暑不輟嚴以課子子麟亦髫年入庠孝事母與祖母知縣鄭羽侯申曰姑媳節義雙全祖孫孝慈備至御史李粹然旌其門曰孝由天性巡按劉源濬額曰鄉黨稱孝督學張九徵額曰一代女宗石氏卒年八十八馬氏卒年七十九麟子潮康熙甲子副榜濤邑庠生

婁氏生員任三樂妻守節四十餘年子必進事之色養備至院司給扁曰節孝濟美氏卒年八十三

馬氏廩生韓太初妻夫卒氏年二十四子淑文七歲太初病革時謂氏曰吾子頗聰穎嚴訓之使繼吾志地下瞑目矣氏書遺囑於側日夜課讀四壁蕭然冰霜愈勵淑文亦曲喻母心矢繼父志順治丁酉科以易經冠兩河辛丑成進士歷任順義長甯令晉江南無為牧文章政事班班足紀皆慈誨之所致也孫十人皆英俊氏享年八十有四以子貴封孺人

吳氏馬士重妻夫故遺孤麗未週氏上事翁姑下撫弱息冰操凜然翁姑歿撫夫弟士誠成立子麗稍長讀書入庠

馬氏陳丹心妻夫歿氏年十七一女甫數月氏翦髮毀面刺血斷指誓死守卒年七十五

衛氏東存嗣妻夫歿氏年二十一家貧甚勵志堅守夙夜紡績事姑盡禮課子綬成立入庠卒年七十七順治十五年知縣李芳春給扁曰貞節可風

馬氏生員陳丹桂妻夫歿氏年二十子鈐甫三歲甘心守義姑目失明氏泣禱於天尋愈遭亂城陷氏負姑逃難獲免教子鈐饒於庠司道扁曰節孝足風

馬氏常州府知府張宏志繼配宏志卒於官前室子鼎德稍長病弱幾危次子同德甫十齡餘無戚屬時值變遷備極辛苦始得歸葬未幾鼎德亡氏撫同德及鼎德遺孤演成立同德苦讀父書布素自甘事馬氏如生母人兩賢之

麻氏馬應召妻夫故遺子空羣七歲家貧甚氏紡績苦守教子入庠空羣亦孝

文氏洪賢妻夫歿苦守五十餘年年八十無疾而逝子克印庠生  
色養備至淹通經史知縣鄭羽侯以賢良待詔獎之

樊氏劉進賢妻年二十四夫故遺一子三歲氏誓死守節艱辛備  
至撫子觀國成立為臬司掾後觀國夫婦繼逝氏撫其週歲孤  
濤成立孀居五十餘年卒年八十一曾孫晉食饒為邑名士

師氏張師載妻夫早世撫遺孤穎家貧租房半間上漏下溼苦無  
燈火每逢月夜紡績雖貧至赤骨而貞節愈勵

劉氏衛瑁妻年十七夫故有子方六月家酷貧操勵金石卒年八  
十五

章氏貢生張巽德妻子歸七載夫故氏甘貧守義撫孤子洽成立  
入庠知縣顧芳宗以完節撫孤旌之

洪氏麻恂妻夫早故家計蕭條夙夜紡績竭力奉親教子生苞等

三人成立知縣顧芳宗以歲寒一節旌之

張氏生員夏熾妻夫卒子慧兒甫離襁褓氏慟欲自盡祖姑師氏時年九十曲諭而嚴防之乃忍死守節孝養備至無何慧兒又亡祖姑與姑亦相繼歿翁置側室袁氏生一子名五九週歲而翁復卒氏同袁撫五九艱苦備嘗知縣顧芳宗旌其門曰貞孝昌後五九更名象九入汝庠止一子氏擇夫族姪汝績承嗣

東氏樊士惇妻夫故遺孤樞僅三月家貧無依氏堅志苦守撫孤成立

王氏生員閻垞妻于歸六年值明季兵燹氏佐夫奉姑備歷辛苦夫卒氏守志養親姑病祈以身代撫孫治成立入庠  
陳氏于大妻夫故子立無依矢志守節教子自泰入庠

龍氏生員鄭位妻夫卒守節事翁生養死葬竭力經營教子璞髻



齡入庠知縣周起龍旌之曰敬姜風範

崔氏庠生石理妻于歸六載未育勸夫娶隋氏為副室生子凝祚夫病故崔年二十四隋年二十苦節共守事姑盡孝教子成名邑人並舉貞節奉旨建坊入祠

閻氏 贈文林郎張奇構妻賢淑明大義事翁姑維謹翁姑與夫相繼逝氏年二十五遺孤延福尚在懷抱氏紡績撫孤稍長使就學夜則母子共燈火機聲與書聲相應茹荼者幾五十年後延福成進士貴溪縣知縣氏以子貴封孺人壽七十三奉旨建坊入祠

艾氏生員閻永言繼配夫故事翁姑以孝聞撫前子煦與子熾均愛無私教之先後入邑庠無何煦與熾俱逝煦遺子壇幼多病煦妻王氏熾妻趙氏同心撫育壇稱克家孫男繼興艾登上壽

而王亦垂白矣艾與王均奉

旨建坊趙氏旌表未符年限

督學張考扁曰柏舟濟美

閻氏衛濬哲妻結縭五載夫故一子坪氏年二十四守貞撫孤坪未及授室而亡以夫胞姪塔承嗣愛如己出娶張氏善事孀姑無何塔亦故遺子文銳姑媳同撫育成立邑人公舉閻與張均奉  
旨建坊入祠

任氏張淦妻夫故氏年二十四勵志守節教子餘慶讀書娶靳氏生一子餘慶又亡子延熙方數歲靳善承姑志同心堅守撫孤成立督學張考旌其門曰姑媳同貞乾隆元年  
恩賜任氏

粟帛

張氏閻浹妻夫病盡氏日侍湯藥無怠容夫歿無子守節五十餘年撫夫弟次子懋詣為嗣督學張考旌曰貞志全桃

高氏庠生靳珩妻夫卒矢志守節遺孤以濟九歲氏教之讀備嘗艱苦子未授室氏以積瘁卒以濟後入邑庠督學張考以仁孝節義旌之

張氏監生閻懋勤妻夫故守節助姑持家內外貼然撫子承燦成立督學張考扁曰閨閣完人卒年七十三

田氏黃兆印妻年二十六夫故遺子夢麟甫十月氏上事舅姑下撫弱子孝慈兼盡後夢麟入邑庠氏壽踰八旬諸孫林立知縣劉倬扁曰節孝俱芳督學張考旌曰陳孝曹貞

張氏生員湜次女生員閻懋第妻姑患瘋疾不能語氏善事之數年不懈夫故氏年二十五遺一子旋殤撫夫弟子熠為嗣守節逾三十年督學張考旌曰苦節全桃

趙氏庠生張漳妻夫故守節撫子錫袞成立娶高氏生一子錫袞

遽亡子未幾殤姑媳同守十餘年高又物故以夫胞姪錫銘承祀銘亦中道亡無子苦節待旌卒年九十餘

郭氏庠生張延慶妻于歸七載夫故矢志撫孤子又殤以夫姪培中承繼守節歷三十年督學張考以苦節可貞旌之

劉氏張夢美妻夫故子寅亮九歲家貧氏茹苦自甘教子成名守節五十餘年以貧故未邀旌表

高氏閻忻妻年十八于歸越三載夫故家貧孝事翁姑守節三十餘年督學張考給扁曰苦節堪貞

曹氏高可銘妻于歸五載夫故氏明大義上事孀姑下撫弱息忍死苦守教子玉節寬嚴並濟延師之費咸資紡績乃玉節完婚未幾又逝氏恐姑過悲多方勸慰姑壽九十奉旨恩賜粟帛督學張考以節孝可風旌之

唐氏張克惠妻幼通內則于歸七載生子二夫故氏年二十七截髮斷指以志堅貞守節歷三十餘年二子悉成立克家邑儒學表其閭

高氏閻甲業妻生子淳兩月夫故氏親紡績勤操作艱苦備嘗孝慈兩盡督學張考以節比松柏旌之

曾氏王士義妻年二十五夫故守節撫孤子相成立督學以閨閣完人旌之

王氏姚進諫妻夫故苦節撫子欽韶成立娶黃氏未幾欽韶又逝姑媳同貞知縣葉扁曰秋霜比節督學獎曰兩世全操黃壽九旬餘屢邀 皇恩賜粟帛

王氏張維翰妻年十八于歸越八載夫故遺子肇啟方三週教養兼至肇啟讀書入庠先氏卒氏飲泣撫孫年八十三卒

靳氏張涵妻年二十四夫故撫子克繼名著成均守節歷五十餘年 旌如例

曾氏姚進言妻年二十一夫故家貧如洗泣血撫孤嘗云吾之未即死者為一綫禋祀故耳知縣葉允信以節比松筠旌之

田氏張爾發妻結縡十二載夫故氏年二十八子璉方在襁褓苦節自矢教子成立娶石氏越四載璉亡遺孤岱姑媳同志撫孤石更體姑意毫無姑息岱入庠克振家聲田壽八十一太守徐而泰旌曰松節鶴齡石壽七十八懷遠將軍汪楊旌曰代終不匱督學張考以兩世徽音旌之

王氏張儒妻年十八于歸事姑孝相夫克家未幾夫故撫子恆祿成立苦節三十年有司旌之

竇氏田宜蔥妻年十八于歸四載夫故一子惇甫週歲氏勵志撫

孤苦節六十年如一日督學張考給扁曰皓首全操

馬氏李大智妻年十八于歸一載夫故一子廷樞僅兩月翁姑年老夫兩弟俱幼氏以婦代子職生事死葬盡禮延師教子弟皆成名守節三十二年闔邑公舉氏固辭時論高之

王氏戚均妻于歸二載夫故撫子廣禮矢志堅貞守節六十二年廣禮娶鄺氏旋即物故遺子煥姑媳同撫養成立煥娶鄧氏未育鄺與子煥相繼亡節艱辛苦守王已旌表鄺與鄧各憲飭刊彰善坊以示鼓勵

司氏田富妻年十九夫故無子氏翦髮自誓苦節三十七年撫夫弟子玉珂承嗣

田氏庠生宜華女增生閻懋衍妻于歸七載夫故無子撫夫弟懋爵成立取其子燠承夫嗣有僕婦李氏亦少寡無子無依氏遇

之厚李得全節太守崔應階旌曰蘭幽玉潔

張氏朱珍妻夫故子長德甫週歲氏守節撫孤成立克家孫東藩  
入邑庠氏壽九旬而終督學旌之曰貞節松壽

馬氏拔貢鳴廷女適王永祚六載夫故遺孤登第四齡氏冰霜勵  
節教登第入庠娶麻氏生子四人登第故麻年二十四孝事孀  
姑教子養醕成名督學張以一門雙節旌之

孟氏生員馬賓側室生子世緒方九齡賓歿氏斷髮毀面勵志守  
節教世緒早年入庠娶張氏世緒又亡遺孤善繼姑媳同貞訓  
迪善繼入庠上憲額其門曰燕樓完節

竇氏生員師峻德妻夫故氏體夫志撫夫兩弟成立仲三與鄉飲  
季庠生教二子紀經均成名知縣旌之曰陶孟齊輝年七十八  
卒



閻氏韓楷妻夫歿子光國五齡氏上事老姑下撫幼子孝慈兼盡子早亡氏勤苦紡績垂四十年惜未請旌

陳氏曹士俊妻年二十七夫故遺子殿颺甫兩歲氏事翁姑以孝聞教子早年成名督學張以壺範堪式旌其門

李氏庠生張佐妻夫故遺三子家計蕭條氏撫孤成立苦節五十餘年乾隆戊午上憲以完節昌後旌之

鄺氏僧生黃瓊妻夫早世遺子秉銓未兩月氏撫孤守節歷五十年御史張給扁曰貞孝成性

楊氏沔陽州知州士元女無為州知州韓淑文子監生標繼配年十七于歸孝事翁姑克盡婦道越四載夫故無子氏欲身殉家人勸解乃忍死守節三十餘年以夫姪光德承祧督學旌曰名

門節孝

趙氏王允恪妻事姑孝年二十八夫故遺子文光甫八月氏勵志守節教子成名知縣劉倬旌曰慈孝維風子遵氏命施普濟堂地三頃三十畝總督王士俊以克承親善旌之氏年八十無疾而終

東氏黃玘妻年二十二夫故氏事祖姑及翁姑盡孝撫嗣子秉麟成立苦節四十餘年

李氏王悌妻年十九于歸翁姑先歿有祖翁姑在堂氏奉事維謹年二十五夫故氏躬勤紡績為夫幼弟完娶撫週歲孤開運成立年六十無疾而逝孫曰珩曰玟皆入庠

張氏生員東廷璧妻子歸三載夫故遺孤卓氏忍死撫孤守貞不渝有司旌之

閻氏生員濤次女王庸妻年十九于歸二十三夫故翁姑衰老氏

侍奉維謹撫夫姪懷玗為嗣愛如己出守節三十餘年卒

劉氏沈邱舉人璐女東宗潢妻年二十夫故一女甫週氏善事翁

姑待幼叔有恩以夫姪疏為嗣並能擴充產業按舊志為東爾公妻爾公字也

今據東氏家譜正之

王氏增生大來女石毓琇妻年十八于歸二十夫故矢志守節孝事翁姑歷三十年不懈以夫從兄毓璘子秉鑑承祧

王氏二謨女生員韓緋妻通孝經明大義年十七于歸事翁姑盡禮衣履皆手製家人請代氏曰翁姑命非汝所宜代也治家勤儉嚴肅有法夫亡遺子丙未週歲氏殷勤教誨稍長使從學授以小學曰此為人根本也丙童年好學弱冠餼於庠成歲貢夫三兄夫婦相繼逝遺一子作梅氏愛如己子作梅亦事氏維謹年近六十猶出告反面雖夜歸必問叔母安否或盛怒氏至一

言而解氏歿哀毀骨立作梅有令名氏歿後閩邑公舉節孝督學張公考以貞志不朽旌之閩邑贈巾幘完人扁額據家傳補較舊志加

史氏陳應禎妻夫故氏甘貧守節撫子文明文昇成立每夏施茶四十餘年無閒雍正十二年建普濟堂氏勉力捐銀五兩知縣劉獎以扁曰巾幘善人

郭氏歲貢如嶽女廩生王允仁妻允仁故無子郭絕飲食誓死殉翁姑曲諭之乃忍死勵節越二載翁逝與姑相依為命承色笑視寢居歷五十年如一日撫幼叔允鶴成立生子二長疆甯次宏璠悉成名以宏璠承夫嗣無何宏璠又亡妻錢氏無出青年苦節事姑以孝聞撫夫兄疆甯子蘭馨莒馨為嗣

張氏塾江知縣張悌女慶陽知府趙大生子國學生言遠妻年二

十二寡子立嬰甫邁氏苦節自守教子弱冠列黌序娶媳韓氏生子敏二載立嬰卒韓年二十三向姑泣曰趙氏兩世止此一脈耳天若祚我則姑媳終身之賴在此子也未幾敏亦夭韓與姑哀痛幾絕家計漸消艱苦萬狀姑慈媳孝相依為命歷二十餘年不渝初志從族議以從姪述祖承立嬰嗣知縣高公旌曰松筠同操乾隆戊午督學以兩世貞操表其門

李氏劉國珙妻年二十二夫故遺子二長二歲次數月氏痛哭投地誓以身殉翁姑泣諭之曰爾死固當親老子幼忍輕割耶氏聞之瞿然起封髮毀容示無異志翁姑歿勉力殯葬延師課子督責不稍懈長子泰入成均次子華庠生知縣旌以母範兼師督學汪扁曰勁柏葆青

朱氏鄧輝宗妻年二十夫故遺孤未匝月氏堅志守節拾遺穗勤

紡績事姑能孝撫子成立邑令旌之

姚氏李理妻結縭九載夫故氏年二十七上事翁姑下撫二子孝慈兼盡守節歷四十年子春芳成名氏年近七旬無疾而逝乾隆二年督學張以閨中令範旌之

司氏張奇謨繼配夫病篤氏籲天祈以身代竟不愈易箒時囑曰余親老子幼仰事俯畜惟爾是賴勿輕生俾上下無依氏號泣聽命夫歿孝事翁姑翁壽九旬氏教子嚴延師課讀修脯悉紡績所出子延祿延爵延言皆成名知縣張為旦旌曰懿德裕後趙氏庠生田沛妻年十七于歸數年夫故撫長子梓次子方玉成立苦節四十餘年

周氏武德將軍胡璟子子旭妻年十九于歸會姑染沈疴氏祈以身代不愈乃割股和藥以進姑飲之病良已年二十四夫故遺

一女甫三歲氏痛死復甦者再守貞自誓事孀姑以孝撫嗣子如己出知縣高思雍旌曰節孝兼隆督學張考表曰節並寒松年八十五猶紡績不倦教訓諸孫亦皆有成

韓氏溫縣教諭際亨女張士藻妻年十八于歸士藻遭父喪哀毀不食七日卒遺孤週歲且廢疾氏小心調護撫養成立又嚴課諸孫長桐次樸皆入庠年九十一無疾而終

李氏張世誠妻夫故守節性至孝曾割股愈親知縣張為旦以節孝雙輝旌之

師氏田模妻年十七于歸越二載夫故氏截耳自誓苦節四十餘年撫子祖禹成名督學汪士鋁以松勁蕙芳旌其門

趙氏衛增妻年十九于歸事翁姑以孝聞未幾夫故遺一女氏苦節自勵撫夫弟子文鍵承嗣教訓成名乾隆十一年督學汪士

錚旌其閭

吳氏馬子棟妻年十九于歸越四載夫故氏翦髮毀面自誓奉翁姑孝撫遺孤慈子之藩又早亡氏撫弱孫教養備至次孫顯穗入庠知縣張為旦以含飴育秀旌之

高氏庠生田桓妻年十九于歸七載夫故氏勵志守貞上奉翁姑下撫其子炳及夫姪烜成立有孝義聲烜娶閭氏炳娶苑氏烜炳皆早亡烜無子炳子華遠高氏念兩世一息訓課尤嚴一門三節督學汪以疊芳傲雪旌之

按炳舊志曰書乳名也今更正之

竇氏師三疆妻年二十二夫故氏堅志苦守紡績自給教子宗武入庠膺巾幗完人之褒

王氏生員師寅母年二十七夫故氏苦節自甘事翁姑克盡孝道教子入邑庠



田氏韓瑗妻于歸六載生一子未彌月夫故氏事翁姑克謹訓孤  
兒聘入庠守節幾六十年乾隆二年督學張考旌曰閨閣典型  
陳氏廩生閻浚繼配幼貞靜長嫻內則于歸執婦道維謹事姑以  
孝聞夫故遺四子長懋德學業深邃精詩古文工書法蚤年食  
餼為邑名士次懋第三懋衍四懋爵悉行成名立知縣范旌曰  
萱茂荆榮

李氏鄧士采妻年二十二夫故遺子甫週歲翁姑年老氏色養備  
至教子成立守節歷五十年

李氏生員宋一經妻年二十一夫故子僅方三歲氏事親撫孤孝  
慈兼盡仍承母訓早年入庠孫三人均列黌序陳州知州左峴  
以節孝雙美旌之以上舊志

馬氏承烈女閻履泰妻年十七于歸越七載夫故氏年二十三冰

蘇自持撫遺孤培初成立娶媳趙氏培初又早逝姑媳苦守四十餘載乾隆二十七年撫憲奏准旌表並給扁額馬曰清標

彤管趙曰一門雙節

崔氏魯聖潤妻年二十四夫故子體鐸四歲氏忍死守貞撫孤成立娶媳張氏年二十五寡長子四齡次甫二週姑媳相依勤儉度日崔壽九十張年七十五

郭氏王龍官繼配年十七于歸二載夫故事翁姑委曲承順教嗣子冬芳寬嚴相濟年七十卒邑儒學旌曰白首完貞

張氏監生章女王天隨妻年十七于歸五載夫故一子方週氏奉親教子孝慈克盡年七十三卒

李氏王懋澄妻結縞四載夫故子立誠甫三歲稍長使就學氏躬紡績以資膏火學少懈則涕泣相責立誠深自痛悔讀書入庠氏

於乾隆五十七年卒府學教授王乙鰲旌曰恤緯丸熊

張氏王鳳彩妻年十九于歸八載夫故子二長熹珍六歲次惠珍  
僅五月翁年老夫弟鳳鳴未十歲家奇窮饘粥不給翁勸其改  
適泣不從為人縫紉鬻襪履為衣食計有餘必市甘旨奉翁氏  
年七十一卒

李氏廷玉女王揚名妻于歸二年夫故守節姑病焚香叩祝祈以  
身代撫嗣子榮成立

田氏庠生王曰玟妻年二十八夫故無子欲死殉夫弟曰珩以大  
義勸之乃已撫夫姪延為嗣事姑孝延又早逝氏痛極不欲生  
曰珩曰嫂勿悲吾終不忍使兄無後乃擇再從兄祿崇孫晴為  
嗣孫氏教養成立壽八十四督學李榮以節成慈孝旌之

唐氏沈邱廩生唐西庚女王呈祥妻年十九于歸八載夫故子南

薰五歲氏矢志守節奉翁姑孝教子成立

時氏廣德女王芳武妻童養夫家十九合卷二載夫故家極貧未  
半年姑又亡鄰婦或以改嫁挑之氏泣且詈終絕其人撫夫幼  
弟為娶妻生子以延夫嗣

王氏趙雲西妻夫故苦節終身知縣李以彤管流芳旌之  
李氏王秉政妻夫故守節六十年以夫兄子廷選廷幹嗣

崔氏于金榮妻年二十六夫故事姑色養備至教二女有法撫夫  
從兄子三樂承嗣教之入庠

趙氏廣陽村張斗慶妻母家馬旗屯年十七于歸氏賦性嚴毅不  
妄言笑父母舅姑皆鍾愛之年二十九夫故生二男一女舅姑  
相繼歿又當水旱頻仍鄉村室家不相保人懷變詐氏有宅一  
區高阜地頃餘偕二子一女夜則篝火達旦晝惟暫時假寐如

是者連月舅有從弟某利其家產冀氏改嫁則二子可逐也然懼其嚴不可犯因貫通媒棍暗許嫁於淮邑之某姓西去其母家約二十里期送婦至家始受財禮因詭令一人自母家來告曰今晨母病心痛想女甚急望午閒立至其叔具乘親送氏忙迫登道去廣陽六七里氏疑路徑非舊詰其故伊乃顯告曰汝今改嫁有主矣尚又何言氏驟聞驚悶墜地已而大怒勢不北行諸媒棍後先偕至鐵器交擊氏四顧無救思為後圖遂勉強許諾及至娶婦之家則排設香案左右擁之前婦大言曰吾今再醮何須行禮願親作飯以待來人遂闖入廚遇切菜刀兩把執之而出傷女僕一人出門號叫當是時日已暮矣村中人人切齒觀者流涕導以東去哭過某市去母家尚遠市內有二三老嫗牽留勸慰遣人至馬旗屯母迎氏歸當氏逼而北行女稍長

兩男歲星未週皆閉之空室叫號終夜次日歸里母子抱頭而  
哭哀動鄰里其母兄不惜家產鳴於官得按律究治二子師顏  
師孟皆卓然成立家業大興氏年幾望九二子斑衣稱壽氏終  
無喜色嘗謂孫曾輩曰昔老身之受辱中途也何心求生及得  
兩刀在手亦不難刺心自盡然還顧後來祖宗之血脈不忍遽  
斬故隱忍至此此皆命也伊等天不容矣爾曹甚毋仇視之卒  
後 旌表入祠子孫繁衍書香不絕如歲貢殿邦副榜體乾歲  
貢宗軒皆其裔也

按傳節婦者多附會之辭茲據樊聖傳所作張烈婦傳改正  
之以其時地相近傳聞較真也

牛氏臺女王玉印妻子歸年餘夫故無出夫無兄弟氏勸翁納妾  
翁難之泣請乃許妾旋歿勸復娶翁謂年老且死萬一妾來而

我歿妾幼豈無他虞氏謂擇樸實無能者不然王氏絕矣從之  
翁年六旬生一子玉柱氏恐妾疏於保護自鞠育之玉柱常呼  
為嫂母年十三即婚娶欲翁姑早見次媳也及氏歿玉柱葬從  
厚嘗以貧難建坊為憾玉柱生四子以長子雲山嗣其兄嫂析  
居時雲山讓產僅取四分之一兄弟皆循循禮法孫曾繁衍

龔氏士修女舉人王茂松子立魁妻立魁弱冠餼於庠卒時氏年二  
十一守節事親克盡婦道撫夫姪庠生亦曾為嗣氏年六十三  
卒咸豐五年奉旨入祠建坊孫店西門外

以下至王吳氏十人同坊

常氏上蔡監生常振科女增生魯曾妻于歸六載夫故氏年二十五  
夫易箒時囑曰吾上有雙親下有幼子惟汝是賴勿輕生俾老  
幼無依氏飲泣受命孝事翁姑教子士俊入庠娶李氏淮甯庠  
生李文明女越一載士俊歿李無出姑媳相依為命氏享年八

十七李撫夫姪承嗣卒年四十七知縣鄒堯廷贊常曰捐軀匪  
易事育尤難不忘易箒之言克守畫荻之志贊李曰孝事祖妣  
名播鄉鄰一心無愧於貞姬二代共賴夫佳婦均奉 旨入

祠建坊

李氏尹應法妻年十九于歸五載夫故遺二子氏忍死字孤事翁  
姑以孝聞妣氏早世撫夫姪無異所生道光二十年卒知縣鄒  
堯廷獎以筠節松貞撫憲稟奏准入祠建坊

劉氏沈邱貢生劉孔然姊王夢麟妻年二十六夫故子秀儒甫二  
歲氏事親教子孝慈兼盡孫敬五庠生氏年八十九卒知縣鄒  
堯廷以節孝足風旌其門奉 旨入祠建坊

田氏監生登瀛姊王秀榮繼配年二十三夫故前子景芳五歲撫  
之成立翁姑性嚴能婉言愉色以博其歡氏年七十五卒奉



旨入祠建坊

朱氏楊恆春妻年二十五夫故子超五歲氏孝事衰姑姑病所以身代氏年七十卒奉旨入祠建坊

崔氏傅習孔妻與趙氏傅依孔妻均夫故守節之死靡他知縣鄒堯廷詳請旌表奉旨入祠建坊

吳氏王重臣側室夫故守節事翁姑盡禮撫子見初成立年六十卒知縣鄒堯廷詳報藩憲栗毓美奏准入祠建坊

阮氏王宗海妻年二十一于歸七載夫故遺一女方五歲孀姑年近七旬氏忍死孝養撫孤女成立完節以終

金氏謙女范文樸妻乾隆年間人年二十于歸夫夙患病動止維艱氏左右侍奉無懈志事翁姑孝越六載夫故遺一女如氏劉亦寡一子松友同勵霜操撫養成立氏以松友次子百揆承夫

嗣氏壽六十七奉

旨建坊入祠知縣鄒堯廷為文表其墓

藩憲粟旌以潛德幽光

趙氏蘇勳妻夫故守節為夫立嗣乾隆五十一年知縣李以壺範  
千秋扁其門曾孫連城武舉

朱氏竇漁妻于歸數月夫故事孀姑撫嗣子守節五十年乾隆閒

知縣旌其門曰雪操冰心奉

旨建坊里門屢經兵燹而坊

巍然如故

郭氏高鴻勳妻于歸生四子年二十九夫故母家素封為置田數  
百畝氏教子皆成立嘉慶十四年卒壽八十五

褚氏馬輔臣妻夫故守節性好施與乾隆五十一年邑大飢人相  
食氏周濟里黨全活甚眾儒學王潤桂以淑德松操表其門

師氏种師華妻早年孀居教子文光成歲貢嘉慶八年督學吳芳

培以德隆鍾郝旌其門

崔氏增生逢年女馬喜盛妻年二十三夫故孝奉翁姑全節以終  
劉氏金泗妻年十九于歸生二女夫故氏年二十五矢志守節以  
夫兄次子思賢為嗣乾隆五十一年飢疫游臻思賢夫婦皆病  
歿遺三子一女氏辛苦鞠育長孫三泰弱冠入庠氏年七十餘  
卒曾孫曉蘭庠生

張氏于統一妻年二十四夫故子占雲甫三歲薄田十畝餘氏苦  
節教子占雲又早世遺三子氏教養備至長金榜監生次燦榜  
入武庠次桂榜績學未售氏歿於道光二十一年壽七十五  
王氏思訓女閻錫琳繼配年十九于歸九月夫故翁旋棄養夫兄  
弟異居氏獨奉姑四十年生事死葬悉出己貲撫夫兄子淑禮  
承嗣孫松五廩生氏歿後奉  
旨入祠

張氏曹鎮妻年十九于歸四載夫故勵志守節撫夫弟長子好德  
為嗣家貧田僅數畝氏勤儉治家拓產至四百餘畝督學蔡以  
艱貞保後旌之

程氏有才女曹來儀妻年二十于歸八載夫故勵志守節以夫兄  
次子玉堂為嗣時甫三歲氏撫養成立知縣扁曰志傲冰霜

旌如例

馮氏馬世儉妻結縭十載夫故子芳武九歲氏艱苦撫育至於成  
立家計漸裕督學邵以堅貞難老表其門孫二長鍾靈庠生次  
鍾和千總

袁氏廩生郭從義妻夫故貞節自守知縣賜松筠合操扁額

楊氏閭廣妻年三十夫故勵志守節壽六十二

某氏韓來迎妻年二十四夫故守節不渝壽六十三

于氏廣訓女連丕臣妻年十八于歸七載夫故二子興旺興邦俱幼氏守節撫孤盡心孝養翁病危氏哀禱求痊果愈母貧無依迎養於家孫雲入邑庠氏壽百歲

夏氏蘇浩妻年二十七夫故遺子女二撫育成立勤儉持家壽九十七五世一堂奉 旨建坊石廟集南里許

符氏艾廷英繼配年二十七夫故守節教子名言入庠補增廣生進士高崧雲舉人鄧萬吉嘉其節為立碑村前

程氏沈邱監生程如岩女閤培崑妻年二十一于歸三載夫故子錫蕃方週歲女二歲氏上事老親下撫夫兩幼弟及遺子女經營家事艱苦備嘗守節四十年奉 旨入邑總坊儒學王愷典以立志堅貞旌之

熊氏葉某妻生一子夫故貧無依乃編茅自覆為養孤計伯氏利

其少欲嫁之氏知負孤逃服役於王李氏家李亦苦節憐氏有同心善視之及子成立娶妻生女子又天依所主家為性命壽七十餘邑增生王曰珩為作傳

張氏沈邱庠生張體仁女閨肅妻年十九于歸二載夫故氏飲食不入口者數日姑泣諭始食撫夫姪為嗣一孫五歲又天氏大痛曰是天終絕吾後也投繯死年七十二儒學劉齊法扁曰志堅金石

劉氏廩生趙炯妻年二十五夫故矢志守節孝奉翁姑卒年七十  
五道光丙戌奉 旨建坊范亭集西門外

趙氏張懷玉妻年二十于歸生子女各一五載夫故忍死撫孤勤儉持家年七十三卒

解氏呂德妻家赤貧夫亡後日如顛迷狀沿門乞討乃以所得之

餘釀酒不沽亦不飲嘉慶三年甘廟北里許有祖師廟傾圮衆議重修氏乃出所藏酒為延賓用事載碑陰

張氏奇謨次女閻熾妻年二十三夫故守節事翁姑孝督學王大鶴旌曰志凜冰霜

張氏奇敏次女閻東育妻夫故苦節三十餘年

孫氏淮甯生員孫子綱女閻培仁妻夫故苦節四十餘年奉

旨建坊蓮池西閻寨

田氏趙方城妻年十九于歸二十一夫故事翁姑撫弱女孝慈兼盡以夫姪殿臣為嗣氏年八十三卒

李氏武庠生余耀淵妻性柔順善事舅姑年二十八夫故遺孤應康又天勸翁逢運納妾逢運年已六十餘素好義舉創修高寺石橋工將竣適生子震淵咸謂善感震淵生五月氏即保抱提攜

與同卧起及長豪放不事生產家中落氏老猶勤苦操作年六十八卒

張氏魯金聲妻年二十六夫故子東成五歲氏甘貧守節撫孤成立年八十三卒

崔氏廣義女張俊秀妻年十九夫故子春華甫週歲家貧紡績度日撫孤成立姑性嚴氏曲順無違年九十六卒

劉氏李泰來妻年二十九夫故有惡族欲奪其志以計免知縣繆以守義安仁旌之

楊氏羅漢松妻年十七于歸二十四夫故子女二舅姑年老仰事俯畜悉出氏十指聞苦節四十年卒

袁氏樊里妻年二十九夫故一女五歲氏堅貞自守年九十八卒周氏張鳳先妻年二十九夫故家貧氏奉養姑撫子女四人紡績



鋤口後拓地頃餘年八十四卒

朱氏劉文龍妻年二十九夫故奉孀姑撫二子衣食取給十指閒清白之操鄉里交稱

劉氏申防川妻年二十五夫故遺一女夫姪朝淵生甫三月即撫以為嗣氏壽九十六孫曾林立

呂氏司閨女妻年二十二于歸四月夫故勸翁納妾生子氏恩勤撫養年七十四卒

黃氏王守湘妻年十九于歸二載夫故遺一女撫夫姪為嗣及授室生子四媳又亡氏為撫養諸孫成立年八十五卒

劉氏張恆昇妻年二十六夫故無出矢志守貞年八十四卒

竇氏監生閻錫惠繼配本世家女幼承姆教敦禮法于歸後無出夫故氏年二十一撫夫兄第三子淑哲為嗣恩勤周至儒學張

以清風亮節旌之

張氏柏行女閻錫和妻年十九于歸數載夫故遺子女各一氏事繼姑曲意承歡教子不墜家聲年八十一卒

呂氏閻成福妻年二十一于歸六載夫故翁多病氏朝夕奉湯藥不懈教三子能世其家年七十五卒

劉氏庠生雨正女尹鴻緒妻年二十五夫故嘉慶十八年大饑艱苦備嘗撫二子萬金成立孫憲章早年入庠氏年七十七卒

朱氏劉景好妻年十九于歸二十二夫故守節奉姑孝氏年七十卒

許氏廩生劉炳南妻年十七于歸炳南方十二翁姑俱歿家政皆氏主持為夫延師授讀或嬉戲廢學輒婉言勸戒夫奮於學年

二十二入庠旋食餼因赴試染疾遂不起氏年二十九一子方週歲忍死撫孤教子讀書終不應試傷夫所以亡也孫曾入膠庠者數人

王氏閻淑曉妻事翁姑相夫子曲盡其道年二十五夫故子二松聲松蕙氏守節撫孤族人有强悍者以禮化之周濟不責償孫盛鈿曾孫至誠皆庠生曾元二十餘人

時氏金玉書妻年二十于歸生子鴻林未彌月夫故家貧伯氏欲奪其志嫁有日矣氏覺抱子夜逃至母家不復還經理諸務晝夜勤苦有勸以節勞者輒泣下與之美衣食亦泣自念家貧重累母家曷敢復有奢望年近七旬卒道光十八年也氏歿後鴻林始歸家子孫繁衍

曹氏榮憲女趙苟妻年二十二夫故無出家貧寄居母家年七十

二始歸立夫族姪串為嗣氏年七十四卒

徐氏張東昇妻年三十夫故矢志守節撫二子一女成立年五十六卒

劉氏張希仲妻年十八于歸二十五夫故姑衰奉事維謹以夫從姪東萊為嗣氏年八十八卒

李氏周梓妻年十九夫故遺腹生子萬倉姑病氏割己肉煎湯以進姑飲之立愈悍族欲奪而嫁之氏堅志不從紡績自給撫孤成立年八十五卒知縣鄒旌曰松筠同貞

衛氏曹十儀妻年十八于歸數載夫故一子玉振氏貞節自矢撫孤成立知縣鄒扁曰節操堅貞奉 旨入祠

丁氏曹方川妻年二十二于歸三載夫故矢志苦守以夫從弟子學海為嗣教養成立知縣鄒賜聯云苦節三十載馨香幾千年

奉 旨入祠

張氏淑明女劉雲奇妻年二十于歸二載夫故守節撫夫姪漢儒為嗣年九十六卒

李氏張萬立妻年三十夫故遺子女各一苦節撫孤田僅三畝賴勤儉拓業頃餘咸同閒子隨袁公甲三討賊陣亡氏年九十二無疾而逝

劉氏韓浩妻年二十夫故遺腹生子瑤林氏事翁姑撫弱息孝慈兼盡田僅數畝好施與修丁村集橋捐錢三千氏年八十卒

張氏王隋珠妻年二十五寡事孀姑和顏悅色里人有年少孀居者氏每勸諭賴以全節者數人撫夫姪耀峯為嗣氏年七十三卒

馬氏王廷魁妻年三十夫故無出事孀姑維謹姑有疾焚香默禱  
祈以身代仍不愈乃割己肉作羹以進姑飲之遂愈撫夫姪珍  
珠為嗣

鄭氏沈邱武生鄭萬選女武生王華峯子上賓妻年十七于歸甫  
五月夫故翁已六旬氏勸置側室翁旋歿遺腹生子名小難氏  
撫養恩勤備至王氏賴以不絕

某氏城東北六十五里上張寨張某妻夫兄弟四人夫年最幼于  
歸數年夫故無出家赤貧孀姑且瞽夫兄弟各自立爨氏居小  
屋二間行乞以養姑終無懈志族棍有欲奪其志者夜撞門聲  
甚厲氏恐被刦即從梁上破茅以出登屋脊大聲呼救鄰眾驚  
赴得免行動常以刀自隨一日乞食至水寨官道旁見一布包  
啟視之錢票也納袖中坐待之果有人惶惶至問拾物否氏曰

有須同人驗明相符與否因往某店點驗不差即與之謝以數緡竟不受為立拾金不昧扁懸於當街閣上其族人年高者猶及見之今已無存并其母氏夫名皆不可考

苑氏趙自和妻淮甯舉人苑重華女年二十四夫故遺孤萬言方週歲姑患癰症氏左右扶持嘗湯藥潔茵褥二十年如一日及卒葬從厚妣氏有目疾事之如姑夫仲兄嫂繼逝遺一子氏殷勤撫養稍長命與己子同學知縣鄒堯廷以節孝維風旌其門邑人袁公甲三為文表之諸名人多為詩歌以美其節

龔氏魯思孔妻夫早卒孝事翁姑冰操凜然請旌題曰節大孝純范氏上蔡武庠生范永端姑母魯頌妻夫早故孝事翁姑志操皎然已旌

謝氏傅薰琴妻年二十一夫故事翁姑色養備至撫夫姪朗為嗣

朗後入庠氏年八十卒

侯氏張晉呈繼配于歸期年夫故撫前子祥極有思夫弟逼令再醮氏不從攜子往依母家後歸勤儉自持拓產數十畝年八十五卒

李氏濟川女田夏峯妻年十七于歸二十八夫故一女家貧氏偕娣勤苦紡績財產漸裕事堂上得其歡心撫夫姪春芳為嗣讀書入庠氏年八十一卒

劉氏劉錦章繼配年二十五夫故撫前子成立事姑孝氏年八十卒奉 旨入祠

石氏張殿庸妻年二十五夫故子天仙二歲撫之成立氏年八十二卒

張氏萬榮女曹金聲妻年十九于歸二載夫故道光十三年也遺



腹生女有勸氏改適者氏以死自誓孝養翁姑能得其歡姑老患癱偃卧牀褥進湯藥滌污穢歷八年如一日翁姑歿拮据營葬零丁孤苦卒以節終

牛氏張清鑒妻年二十三夫故僅一女撫夫姪天階為嗣氏年八十卒

張氏李丕潤妻年二十七夫故遺二女姑老且病氏事奉數十年不懈先家貧與娣氏爭任勞役不積私財後置地數頃以夫姪繡錦監貢兼祧氏年八十四卒

劉氏朱廣方妻年二十七夫故子金瑞四歲氏事親教子克盡孝慈年八十一卒

張氏劉廣妻年二十六夫故子國祥甫三月氏孝親撫孤治家勤儉年八十一卒

鄧氏王文敬妻年十七于歸二十夫故子金滕尚在襁褓家貧氏紡績撫孤家業漸興年七十六卒

李氏閻淑唐繼配于歸未幾夫故守節以夫從兄淑适次子為嗣氏年八十餘卒

李氏淮甯庠生李芳實女劉文謙繼配于歸生一女夫故翁姑相繼歿零丁孤苦志節彌堅撫夫從姪德修為嗣氏年五十九卒

趙氏史昇妻年二十七夫故撫夫姪如子守節以終

杜氏張道傳妻年二十夫故無出孤苦無依終能以禮自守年七十五卒

吳氏解天成妻年二十九夫故撫子成立守節不渝年七十八卒

宋氏于景榮妻年十九于歸八載夫故子興方數月薄田八畝紡績自給及子成立田產日增後子婦並歿氏撫孫鴻林恩勤備

至年七十九卒

楊氏劉宗義妻年十九于歸二十八夫故守節撫夫姪照禮承嗣  
孫雲箱早年入泮氏年六十九卒

榮氏周培興繼配年二十于歸一載夫故前子鴻恩九歲教之甚  
嚴人咸疑其刻氏望子有成不恤也鴻恩奮志讀書早年入庠  
且拓產數十畝

勾氏張嘉言妻年十九于歸二十夫故事翁姑孝勤紡織勞苦成  
疾卒年四十二以夫姪敬友為嗣

高氏張春茂妻年十七于歸二十九夫故遺一子三女家貧氏艱  
苦撫育藜藿充飢終無渝志年四十六卒

李氏鄧效魯妻年十九于歸事繼姑無違二十四夫故一女方在  
襁褓無何女又亡或憫其貧無子諷以改適氏艱然絕其人夫

兄效力夫婦相繼歿遺孤錫羣僅三歲氏撫之成立兼祧兩門  
楊氏王敬久妻年二十九夫故事翁姑撫幼子孝慈兼盡年七十  
五卒

李氏王相齡妻夫故守節三子皆幼家赤貧為人澣洗縫紉資以  
餬口冬月無卧具黎明即起操作以甘旨奉親己則敝衣糲食  
歷二十餘年三子皆能自立翁姑歿竭力營葬郡守獎以潛德  
幽光撫憲稟奏 准入祠

李氏王心田祖母結縭十載夫故子四翁姑年老家極貧衣食悉  
出氏十指聞長男出繼次子三子俱全撫幼子成立郡守瞿扁曰  
潛德幽光撫憲稟奏 准入祠

趙氏王金經妻夫早亡子十齡又天家貧賴夫從姪松萬養贍四  
十餘年且為請旌撫憲稟扁曰苦節能貞以夫姪吉訓為嗣

馮氏樊濟南繼配年十九于歸二十三夫故舅年老性嚴急氏委曲奉事以夫姪庠生在山為嗣在山早亡氏年七旬家計日薄晝夜勤勞無怨言

樊氏張萬榮妻年二十夫故遺孤國望方週家素裕族中強暴欺氏寡弱睥睨其貲夜率數人鼓噪入氏抱子及舅姑踰牆匿鄰舍數次皆幸免于能自立不墜家聲

王氏任泰祥妻夫故守節道光十四年督學劉以不負所天旌之子貫一卒妻崔氏亦守節藩憲粟以操比松筠旌之子孔卓歲貢錫爵廩貢

曹氏武庠生鴻業女夏長峯妻年十七于歸二載夫故遺腹生子攀桂越月適母家有以家貧子幼勸改適者氏泣曰貧何病甯死不忍舍此子而他適也翁年老氏能曲體其心處娣似犯而

不校年五十七卒

閻氏監生彭齡女楊世宗妻性貞靜寡言笑年十九于歸三載夫故遺孤克用甫週夫兄弟析居氏獨力奉姑二十餘年夫兄歿貧不能葬氏鬻己田數畝助之教子成立家業日增氏年七十卒 旌如例

傅氏司樹德妻年二十一于歸二載夫故一女氏矢志守節孝翁姑和妯娌里黨交稱

周氏師維坤繼配年二十二于歸月餘夫故誓勵清操年七十四卒

樊氏高萬福妻年二十夫故苦節是守事衰姑撫遺腹子孝慈兼盡年八十二卒

張氏毓秀女王文田妻年二十一夫故水漿不入口誓身殉妯娌氏

苦勸始意轉撫夫姪金聲為嗣恩義兼盡金聲亦孝氏年八十  
二卒

胡氏年二十歸涂忠先為繼配道光二十年夫故氏二十一無出  
撫前子有恩翁姑相繼歿鬻產營葬子成立娶馬氏越三載子  
亡氏大痛咬指流血誓與孀媳苦守未幾馬又亡氏益孤苦鄉  
里哀之

張氏楊魁妻年二十一于歸五載夫故遺腹生女翁姑衰力盡孝  
養撫夫從姪華春為嗣苦節以終女歸淮甯李端叢數載夫故  
遺二子家貧苦守壽九十一郡守蔣以勁節延年旌之子杜文  
淮甯庠生

時氏閻錫思妻年二十一夫故無出姑歿氏勸翁續娶為宗祀計  
不可懇親族婉商仍不可乃暗出匱資為娶楊氏生子錫庚女

二翁歿錫庚年十二為延師授讀錫庚生二子長淑楹氏撫之以承夫祧初地僅數十畝後拓至八百餘畝氏年七十九卒  
田氏張芳聲妻年二十五夫故姑衰病氏殷勤服事撫夫姪國賀為嗣

李氏郭麟臺妻年二十八夫故孝事翁姑撫子紹奎紹經紹廷紹凝均成立卒年七十二督學費以節光彤管旌之奉 旨入祠孫曾入庠貢成均者數人

孫氏馮某妻早寡苦節終身督學以竹柏懷清旌之

某氏麻合妻年二十四夫外出不返一子早夭氏守節養姑撫夫從姪為嗣年七十六卒

李氏庠生漫林女束繼善妻夫早卒遺孤體正姑卧病三載氏躬親湯藥無怠容教子成立產業日增年八十二卒



夏氏黃儒臣妻年二十九夫故遺一女氏善理家內外井井一門三十餘口無閒言年七十二卒

胡氏馬東方妻年十九于歸一載夫故苦節不渝撫夫姪世統為嗣氏年七十四卒

田氏五振女劉耀珍繼配年二十一夫故撫前室三女恩誼篤摯以夫姪子朗為嗣氏年七十一卒 旌如例

朱氏左雲生妻年二十二夫故守節事翁姑孝教子成立

劉氏索號妻年十九于歸數載夫故遺腹生子瑤林家貧親老氏竭力奉事撫孤成立氏年八十卒

張氏田海芳又名田滾妻年十九于歸二十四夫故遺孤騰坤授室後生一子春省夫婦俱逝氏撫幼孫操持家務困苦難以言狀年七十三卒

張氏庠生振緒女孫學易妻年十九于歸期年夫故遺腹生子鳳彩翁與祖姑在堂事之必以誠敬待夫弟妹恩禮兼盡婚嫁竭力營辦以博堂上歡夫二弟相繼逝撫三姪成立子英年入庠孫綬曾亦庠生諸孫並能世其家氏年八十七卒

李氏劉照繼配年二十于歸四載夫故遺一女夫弟炤亦早歿以其子斗山兼祧族人有峻氏擇賢為嗣者氏不從曰一門雙桃先夫遺命也敢違諸知縣覺羅榮以毓桂雙榮表其門

傅氏田承業妻年二十夫故撫夫弟子連登為嗣教之讀書入庠知縣旌其門曰瑤池冰霜

張氏趙朝妻年二十五夫故遺一女家貧無養且恐為強暴污依母家居二十餘年非樵汲未嘗輕出完節以終

王氏李心範妻于歸數載夫病禱於神求身代不愈剗肉和藥以

進夫竟不起撫子華章完節以終

范氏袁金法妻年三十夫故遺二子家極貧行乞以養二子皆成立氏年九十卒

李氏閻錫山妻年三十夫故孤苦無依紡績度日終身不易其操李氏夏蓉鏡妻年二十一夫故子未及週氏安貧守志其奉姑之孝治家之勤迄今鄰里猶豔稱之

李氏种東海妻年二十于歸一載夫故敬事翁姑撫夫姪薪傳情義周至辛苦備嘗督學費獎以勁節遐齡奉 旨建坊入祠

王氏張文學妻年二十三夫故遺二子氏勵志守節勤儉持家教子讀書拓田三百畝親友扁曰節壽雙全年九十一卒

王氏閻連峯妻年二十九夫故遺腹生子氏竭力養親殷勤教子年八十七卒

田氏廩生秀發女樊端木妻年十七于歸五載夫故事親撫孤孝  
慈兼盡年七十一卒

于氏心誠女年二十一歸張某五載夫故翁姑憐其幼欲嫁之氏  
矢志不從守節以終年六十三卒

竇氏張東瀛繼配年二十二于歸生二女一子夫故撫前子如己  
出孝翁姑和娣姒氏年八十三卒

張氏時玉珍妻年二十八夫故子五歲女方週艱苦備嘗不渝初  
志年七十九卒

張氏夏蓉軒妻結縭五載夫故苦節是甘撫孤成立

張氏吳大雪妻童養夫家合卷未幾夫故氏年十九無出一志守  
節年八十四卒

某氏麻小安妻年三十夫故事老姑撫幼子內外賴氏一身支持

子完娶後旋歿遺一子夫弟亦中年歿遺孤皆在襁褓一門三節清白自持氏年八十三卒

張氏王百祿妻年二十八夫故遺一子二女氏忍死撫孤年六十二卒

趙氏張瑄妻年十九于歸二十三夫故貞潔自守閨門嚴肅督學錢以苦節堪貞旌之

李氏張廉妻年二十一于歸一載夫故清潔自矢鄉里交稱督學錢以松茂竹貞旌之

高氏趙鳳儀妻年二十一于歸六載夫故矢志苦守事翁姑孝教子女成立壽九十三曾元蔚起五世同堂

李氏崔茂林妻年十七于歸數月夫故矢志守節年八十四卒

鄧氏馮應中妻童養夫家年十九合卺未幾夫故遺一女旋殤氏

孝事舅姑撫夫幼弟應林成立艱苦備嘗以夫姪月朗為嗣氏年七十三卒

徐氏孟昭元妻年二十八夫故遺一子二女田僅數畝矢志撫孤艱苦備歷年九十八卒

劉氏增貢楊逢春妻年二十六夫故事孀姑撫二女孝慈兼盡以夫姪孫庠生龍驤為嗣氏年六十餘卒

高氏監生王海女楊培運繼配年二十二夫故子凱甫三月姑老病卧牀經年氏親奉湯藥不假手臧獲撫前室三女如己出皆為擇配名門遭毫匪亂氏命子築寨保障一方孫文華增生氏年八十五卒奉 旨入祠

鄭氏石五章妻年二十九夫故一子黑驢撫之成立娶後黑驢旋亡又撫三歲孫成立艱苦難狀氏年八十四卒

李氏淮甯監生李耀南女周貫三妻年二十九夫故子之榮數歲氏事上撫下備極艱辛之榮英年入庠因公赴城為惡族周利罕刺殺氏抱弱孫鳴官冤得白知縣杜詳報奉  
旨建坊周營集

周氏張連妻年二十八夫故一子翁姑早世叔十歲氏教養成立增置田產百餘畝孫讀書英年入庠

傅氏楊友桂妻年二十三于歸未及一月夫故氏矢志守節事親孝處妯娌和翁姑晚年多病朝夕扶持無怠容鄉里稱賢

申氏張東曉妻東曉有文學恆徹夜讀氏勸之曰父年七旬只汝一人獨不為老親地乎曰我正欲顯親也讀愈力以積勞致疾卒氏年二十四欲殉念老親在乃以婦代子職翁病焚香祝天願減己壽一紀益親果愈後十年卒咸謂氏誠孝所感

李氏張大義妻年十八于歸二載夫故苦節四十年以夫姪桂榮為嗣

譚氏庠生張來臨繼配年二十七夫故撫前子女有恩事翁孝延師教子讀食餼於庠

韓氏田振環妻子歸四載夫病革執氏手哽咽曰汝如何曰從君地下耳夫曰汝死吾母無依吾不瞑目矣我雖無子有姪可承嗣言訖而卒氏遵遺囑曲意孝親撫夫姪承嗣年七十餘卒

倪氏范澄清妻年二十于歸澄清績學未遇年二十四病故氏矢志守節撫子榮顯成立年七十餘卒

丁氏張主妻結縭數載夫外出不歸氏年二十四子女俱無矢志不二旌曰徽嗣柏舟

于氏曹懋德妻子歸三載夫故遺腹生子友尚氏撫養成立督學



劉以清節可風旌之

東氏擇升女趙殿明繼配年三十夫故孝事翁姑撫二子成立年六十五卒

衛氏吳三畏妻夫故遺一女家奇窮俾女童養夫家有勸改適者氏怒詈之終絕其人傭工自給年九十六卒

劉氏曹鳳章妻年十八于歸四載夫故遺孤萬倉甫晬貧無隔宿糧氏紡績教子苦守四十餘年卒

余氏逢午女曹應楷妻母馬氏瞽侍奉不離側年十九于歸八載夫故遺孤澍三歲氏孝事衰姑教子嚴偶廢學笞責不貸澍弱冠餼於庠氏胞姊適曹氏生一子夫婦俱逝氏收養之長為娶妻生三子皆成立

苑氏夏凝采妻年十九于歸越數載夫故無出苦節終身旌如

例

衛氏庠生太乙姑母適樊氏年二十九夫故撫弱女矢志不渝年七十卒

楊氏王道南繼配年十九于歸二十七夫故守節撫子春山成立氏年七十五卒

石氏庠生張仲居子鳳如妻于歸數年夫故無出翁年踰五旬氏勸置妾不從又託戚族言之納妾生子蒼培蒼植翁旋逝氏撫二叔有恩氏卒以主喪無人停柩十餘年蒼植生子數月即以為兄鳳如嗣葬其嫂因名承嗣

賀氏獻明女楊天義妻年二十三夫故苦節能貞撫夫姪鴻儒為嗣氏年八十六卒

盛氏高徽妻年二十于歸七載夫故守禮不渝終年不輕出大門

子女俱殤氏憂鬱成疾年三十五卒

吳氏省遠女閻瑤鏡妻年三十夫故守節教子澤生有成氏年五十一卒

孫氏希臨女王富貴妻年十九于歸六載夫故守節人無閒言

龍氏士修女王百祿妻年十八于歸二十四夫故孝養翁姑教子女成立

閻氏錫珍女馬萬祿妻年十九于歸數載夫故事翁姑孝翁姑歿夫弟萬全幼撫之成立以夫姪連茹為嗣氏年七十三卒

石氏趙天榜妻年二十九夫故事祖翁及翁姑孝子成利授室後生一子成利亡姑媳同撫弱孫成立

張氏趙鳳池繼配年二十二于歸三載夫故撫前子女有思氏年七十三卒 旌如例

譚氏趙振聲妻年十九于歸七載夫故奉姑孝教子同科入武庠  
氏年七十八卒

田氏趙雙峯繼配年二十于歸五載夫故撫夫姪連捷為嗣氏守  
節以終

程氏張步成妻年十九于歸二十七夫故苦節自守教子純清克  
家增產數百畝氏年八十九卒

趙氏于秀琦妻年二十四于歸事姑孝四載夫故遺二女撫夫姪  
恆春為嗣氏年七十六卒

吳氏袁錫壘妻年十九于歸二十八夫故艱貞自守勤儉教子氏  
年八十九卒

劉氏傅得妻年二十六夫故家貧苦守孝事翁姑撫二子成立氏  
年八十三卒

范氏王儒林妻年二十夫故無出矢志守節事翁姑孝姑歿事繼  
姑如姑氏年五十餘卒

劉氏王和尚妻年二十夫故無出苦節自守孝養翁姑氏年七十  
一卒

崔氏世榮女曹崑峯妻年十九于歸五載夫故撫夫從弟臨洙長  
子為嗣守節四十餘年督學額曰節孝流芳

柳氏高掄喜妻年二十五夫故姑性嚴急晚年喪明氏晝夜扶持  
無違待夫二弟有恩撫遺腹子成立氏年八十九卒

白氏常履中妻年二十五夫故無依恐有意外之變移居戚家撫  
孤成立氏年八十四卒

李氏衛應時妻年十九于歸二十四夫故苦節自守教子成立氏  
年八十七卒

吳氏楊逢春妻年三十夫故姑性嚴氏受笞楚無怨言教子女有法子學海早歿三孫相繼殤晚歲艱苦尤甚年八十卒

馮氏申辰妻年十九于歸數月夫故矢志守節撫夫弟成立氏年七十四卒

王氏劉東木妻年二十于歸二十八夫故遺二子教之成立氏年八十二卒

韓氏郭耀宗妻年十九于歸二十八夫故冰霜勵節撫子三人成立氏年八十卒

單氏張淩雲妻年三十夫故遺子女四人氏矢志完節教子樞厚入庠氏年六十四卒 旌如例

紀氏師心廉妻年二十四夫故遺子甫數月氏事親撫孤完節以

終

謝氏范金山妻年二十九夫故無出守節以終年八十卒

麻氏趙玉韞妻年十九子歸二十二夫故矢志守節孝養翁姑氏年五十八卒

趙氏君弼女舉人劉東甲子紹遠妻翁棄養夫以毀卒氏年二十六孝事孀姑二十餘年撫子女三人成立氏年六十五卒奉

旨入祠

熊氏張應兆妻年二十一子歸八月夫故無出孝事孀姑撫夫從姪為嗣氏年五十九卒

張氏章耕妻年十八子歸年餘夫故遺腹生子家奇窮有欲奪其志者氏避居母家子成立始歸家業漸興年七十三卒

戚氏監生張寶山妻結縡十載遭流寇翁被執寶山趨救遇害翁得逃歸氏年二十九僅一子矢志苦守孝慈兼盡年八十二卒

徐氏趙方儒側室夫故一子甫兩週嫡早歿族無賴欲奪其志氏誓死不從教子成立

周氏趙東懷妻年二十五夫故事翁姑孝撫孤成立知縣扁曰節孝純儉年五十六卒

孫氏王金玉妻年二十六夫故子甫晬氏辛苦撫養守節不渝

旨入祠

張氏李光玳妻年二十夫故守節以終同治間奉

旨入祠

楊氏張景昌妻年二十三夫故事翁姑撫遺孤孝慈兼盡子守樸亦克家拓業千畝氏年八十四卒奉

旨入祠

鄒氏涂丕緒妻年二十四夫故子甫八月氏誓以死殉翁勸曰為夫死固烈奈親老子幼何氏意轉事親教子完節以終

張氏汪明遠妻年十九于歸二十四夫故姑老家貧氏竭力供養惡族欲嫁之氏誓死不從年七十二卒



馮氏張延成妻夫被惡族毆死氏年二十七遺腹生子永玉事姑  
孝教子克家同治三年知縣李以節孝可風旌之孫樹楷樹仁  
任氏竇學禮妻年十九于歸二十五夫故遺二女田僅十餘畝祖  
姑及姑在堂氏竭力奉養撫嗣子有恩同治六年奉 旨入

祠

馬氏庠生李萬齡妻年二十五夫故遺孤僅數月氏事翁及繼姑  
孝教子成立年六十六卒同治七年奉 旨入祠

馬氏國泰女楊培性妻夫故守節孝事翁姑以夫弟子峻峯兼祧  
同治九年奉 旨入祠

王氏趙大盈妻事翁姑孝年二十八夫故惡族欲嫁之逃居母家  
撫嗣子恆義成立氏年七十四卒

袁氏 贈光祿大夫耀東女劉東昇妻年十九于歸五載夫故守

節舅姑有疾氏衣不解帶湯藥親嘗焚香祝天願減壽益親親  
歿日夜號泣目失明同治五年奉 旨建坊丁村集東門外

光緒五年以姪海關道保齡奏

馳封二品夫人年八十五

無疾而逝

馮氏張九居妻年二十五夫故遺腹生子氏矢志守節孝事翁姑  
年九十餘卒

韓氏監生馬璵繼配事舅姑相夫子有賢聲夫故遺孤萬峯甫六  
月撫養成立教以義方孫秀芝貴縣知縣氏性嚴正兒女臧獲  
輩皆敬憚之親族有困乏者周濟不吝知縣彭以松貞萱茂旌  
之光緒丁亥奉 旨入祠

劉氏高美中妻于歸未浹月夫故矢志守節夫從姪積功生旬餘  
母卒氏撫養成立即以爲嗣積功弱冠入庠咸豐庚申以守城

功加五品銜氏 封宜人 旌如例

于氏楊如陵妻年二十八夫故事翁姑孝姑有痼疾左右扶持不怠夫弟早亡妯娌同居三十年無閒言撫夫姪承嗣同治甲戌知縣李以松操鶴齡旌之

聞氏王明新妻年十七于歸二十九夫故無出家計艱難不變其操年八十一卒

李氏商水監生李棟奎女武生劉瑞徵繼配好文學通經書大義勉夫讀書未幾夫病故氏年二十事祖姑與姑無違撫夫姪伯道為嗣延師課讀擇族中有才者俾共學或代為出貲伯道弱冠入庠氏好善樂施修永安寨劉埠口橋皆捐數百金子中年歿氏教孫仲連仲選皆入庠年八十卒 旌如例

田氏竇進善繼配年二十一于歸時夫患喉症危甚勉強成禮越

日歿氏求死者再均以救免姑苦勸始意轉撫夫姪為嗣氏守節不渝年七十二卒

王氏隆萬女玉育民妻年二十五夫故事翁姑孝教子女嚴苦節數十年無渝志遭悍族處以退讓遇困苦盡力周恤子入成均同治十年奉 旨入祠

王氏樊位西妻年十九于歸二載夫故守節教子成立同治九年儒學以節貞孝純旌之氏年七十五卒

馮氏張應坤妻年三十夫故守節孝事翁姑撫三子成立氏年六十六卒

李氏馬萬丙妻年十九于歸踰年夫故遺腹生女姑病氏焚香祝天祈以身代撫嗣子培三愛如所生培三生子盤桂甫三歲夫婦相繼歿氏撫孫成立曾孫祖蔭入庠氏年七十餘卒

郭氏霍妮子妻年二十生一子夫外出不返家貧行乞養姑守志不渝子長理生業奉親必具甘旨鄉里交稱

王氏丁先德妻年二十三夫故一女氏堅志守節撫夫姪仲倫承嗣氏年八十四卒

張氏李連科妻年十九子歸事翁姑孝二十四夫故遺腹生子月華教養成立氏年七十四卒

常氏馮從先妻年二十四夫故孝事翁姑撫夫姪寶善承嗣家素裕氏好善樂施修三岔橋築蔡溝寨各捐錢百餘千親族貧者周濟至數百金不吝臨終將平日所買田地招其人悉與之年七十二卒

趙氏郭金臺妻年三十夫故子紹尹數歲教以義方咸豐二年六月間沈民劉天駟倡亂氏約族中有德望才幹者就本村修築

寨堡出千金為倡凡占人地悉以己地償之衆皆踴躍寨成一  
方賴之同治二年賊據尚店寨總兵張公曜督師圍攻氏遣其  
子送糧草餉軍生平好義急功類如此

戚氏王敬義妻夫故氏年二十五無子夫弟敬仁亦早世妻李氏  
年二十三遺一子娣姁苦節共勵孝事翁姑戚卒於咸豐八年  
李後二年卒知縣張以苦節雙操旌之

王氏全禮女石子鳳妻年十七于歸五載夫故守節奉翁姑孝撫  
夫族姪承嗣邑紳以氏節上達 旌如例

李氏劉萬田妻年二十四夫故無出養子連登五歲氏井臼親操  
艱辛備歷連登娶王氏生子鳳儀連登又亡姑媳同貞李年八  
十一卒

龔氏戚錫類妻子歸五年夫故氏年二十五事翁姑孝完節以終

錫類從姪奪奎妻尹氏年十九于歸四載夫故事姑孝撫夫姪  
金銘為嗣奪奎從姪金鐘妻丁氏逢去女年十九于歸甫三日  
夫故艱貞自守年二十五以疾殞督學以三世節孝旌之均有  
碑表墓

智氏商水監生智術女王心廣妻年二十七夫故事翁姑孝撫孤  
汝霖成立捐入太學氏年五十八卒咸豐八年奉 旨入祠

朱氏左某妻子歸三年生一子夫故氏年二十二守節教子成立  
娶金氏子又亡遺孫二歲金亦守節不變

周氏王玉順妻年十八于歸生三子一女夫故氏年二十八守節  
教子成立長子俊傑妻徐氏于歸十載夫故氏年二十九守節  
不渝

邵氏廩生田炳南妻子歸數年夫故一子數歲貧如洗氏忍死撫

孤乞食自活越數載卒